



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7 Yangia anidakangma : Tir Yimym tir\_yimym

tir yimym TAPAK 8

**Spain tzuimetsung lendong nung nisung jenti asü**

**ICC Rankings: Kagiso Rabada No. 1 asayar kumogo**



VOL. XXII ISSUE NO. 22 (ADOK 22) DIMAPUR YANGTEPNÜ (THURSDAY) MONGPUTENI (OCTOBER) 31, ₹ 5.00

## Fourth Nagaland State Finance Commission tenteter

**Dimapur, October 30, 2024 (TYO):** Nagaland Governor-i Fourth Nagaland State Finance Commission tentetogo ta Finance Department-i metetdaksü.

Nagaland Municipal Act 2023 nung section 125(1) kübok tashi agüja aliba nung ajemdaker Chairman ka den züngsem ana shimogo, ta Finance Department-i ashi.

Fourth Nagaland State Finance Commission nung Chairperson atema Sarah R. Ritse, Commr. & Secretary (Rtd) aser züngsemtem atema G.W Lee, Director, T&A(Rtd) aser Khrupi Sothu, Secretary (Rtd) na shimogo.

Iba Commission indang kümsükji sangdong agütsüba nungi tenzüker ita 12 atema asütsü ta Finance Department-i metetdaksü.

Commission ajanga state sorkar aser Municipalities

tsüngda taxes, duties, tolls aser fees lemsatsüba inyakyim asadanger abentsü.

Parnokisa municipalities ajanga taxes, duties, tolls, fees sarutsü sen latettsü aser state indang Consolidated Fund nungi municipalities nem grant-in-aid agütsütsü latettsü.

Commission-isa municipalities indang senotsü jenjang tajungba akümtsüba den tanga onüktem asoshi asadanga latettsü.

Nagaland Finance Commission Rules, 2008 nung Rule 6 aser 7 kübok Chairman aser züngsemtem indang services aser tanga allowances asütsü aser October 31, 2025 tashi nung küm pungu atema report agütsütsü. Iba ya April 1, 2026 nungi tenzüker 2026-2031 atema asütsü ta Finance Department-isa ashi.

## ANCSU Collegiate Meet 2024 agir

**Dimapur, October 30, 2024 (TYO):** Nagaland nung College sentong tulutiba All Nagaland College Students' Union (ANCSU) Collegiate Meet 2024 tenzüka agidar.

October 29, 2024 nü Livingstone Foundation International College, Dimapur nung iba sentong tenzüker aser November 2, 2024 nü tembangsü.

October 30, 2024 nü Advisor to the Chief Minister aser IDAN Chairman Abu Metha-i ANCSU wako salatsü.

"Kaketshirtemi maongkatem aser tebilemetsü khurettem angatetsüla kechiyong nenok ya state atema teshimtet nübotem lir. Tanü alima ya technology ajanga anir aser India-i Southeast Asia den sendakteptsü atema Nagaland ya tongtipang tesem ka lir" ta Abu Metha-i ashi.

"Trans-ASEAN highway ajanga India-i Myanmar, Thailand, aser Indonesia linüktem den sendakteper anungji Asia den sendakteptsü atema Nagaland ya kanga tongtipang lir" ta pai ashi.

"Takok anguba nung tia mali. Nenoki takok angutsü atema talila merangtsüla. Nagaland nung lanurtemi India renlokba nung shilem agitsüla" ta Metha-isa ayongzük.

"Collegiate meet amala sabangtem ajanga kaketshirtem dak sempet alibatem tali meteta akümer aser ajungketer" ta Organizing Committee Convenor Tsukjem Lkr-i ashi.

ANCSU President Tenyesinlo Bukh-ia tir o jembidang union-i maneni Nagaland nung college kaketshirtem tazungba, sobaliba aser saisapong nung nungita yaritsü ta ashi.

## NH RoW anasa tenokdangatem agientsü tuyur

**Dimapur, October 31, 2024 (TYO):** Kohima Deputy Commissioner-i National Highway nung Right of Way (RoW) ali atsünga agia aliba aser tenokdangatem aliba agientsü tetuyuba agütsüogo.

National Highway nung RoW telongtet nung construction materials, off-road vehicles aser commercial & residential wastes agientsü tetuyuba agütsü.

National Highway RoW nung tyre, timber & bamboo dokantem, gari workshops aser metal fabrication dokantem ajanga osettsüset balala yua lir.

Iba ajanga lenmang temesü kümdaksür aser traffic den public nem timtem agütsür, ta Kohima DC-i ashi.

Maneni, National Highway anasa metsümeshidak, ak ki, tarpaulins, plastic sheets, aser kilentzü aodak tangbanga aliba ajanga public health asoshi timtem agütsür anungji November 3, 2024 matongdang item ya agientsü metetdaksür ta paisa ashi.

Iba tetuyuba sülen manidakertem dak ozüng tapet kübok temerenshi alitsü ta Kohima DC-isa ashi.

## Meluri district akümtsü; ENPO takhangba agizüker

**Kohima, October 30, 2024 (TYO):** Nagaland cabinet-i

Bodbarnü tongtipang telemtetba asem agiogo aser item ya Meluri division nem district agütsütsü, Eastern Nagaland atema tebilemba ashitsü aser Mokochung district nung Assam sorkari arrtsülen mapa inyakba aija telemtetba agiba lir.

"State Cabinet-i Phek district kübok Meluri sub-division nem full-fledged district agütsütsü mulunga agizükogo" ta Government spokesperson aser Forest, Environment and Climate Change Minister, C L John-i ashi.

Nagaland nung Meluri ya district 17 buba asütsü.

"Cabinet lemtet pelashishia agizüker aser Chief Minister Rio o par cabinet dang kanga pelar" ta Meluri MLA aser New & Renewable Energy and NSDMA Advisor Z Nyusietho Nyuthe-i ashi.

"Chief Minister aser cabinet minister temi Pochury nungeri district balaka aginüba asangsang nung atalokdaksüba atema pelaba metetdaksür" ta MLA Nyuthe-i ashi.

Phek district nung Chakhesang nungeri Pochury kin takhangba pusema nungitba atema pelar ta paisa tenüngsang agütsü.

"Meluri nung recognized villages 31 lir aser ali tasazük 1011 sq. kms lir. Meluri nung administrative headquarters 4, industrial town - Wazeho aser International Trade Centre (ITC) Avangkhu lir" ta Nyuthe-isa metetdaksü.

Official district declaration ceremony atema mapang agitsü aser aluyimba mapang asüba den ano benjung mapang tonga arur,



anungji sangküm ang iba sentong agitsü ta paisa shisem.

"Pochury nunger atema tongtipang anogo ka lir. Tsüngremi Pochury nunger asoshi maneni mapa tajung inyakba atema tenüngsang agütsüdi. CM Neiphiu Rio aser par cabinet züngsemtem aser talisa asen Advisor dang peladi aser tenüngsang agütsüdi" ta Pochury Hoho president Jonpa Jurry-i social media post ka nung metetdaksüogo.

Tanü Cabinet senden nungsa ENPO-i akhangba ama mapa inyaksü lemtet ta Minister John-i metetdaksü.

Cabinet senden nung ENPO-i akhangba onük atema jembiteper aser Frontier Nagaland Territory Authority (FNFTA) melatsü lemtet, ta paisa ashi.

"Centre-i ENPO takhangba atema tebilembatem meshiba ama state sorkari langzüksü. Iba ya Lok Sabha election matongdang

31 recognized villages

Phor

Meluri  
**POCHURY MAP**

Phokhungri

not-to-scale

state sorkar dang asüngdanga liasü" ta John-isa ashi.

Election maparen ajanga iba onük atema mapa meinyaktet aser November tashi nung state sorkari Centre nem telangzüba agütsütsü ta paisa shisem.

FNFTA tetezü ya ENPO area atema tashi balaka agütsütsü asü ta osangbeneri asüngdangdang "parnok Nagaland state nung shilem ka asütsü aser maneni Arrla 371(A)kübok alitsü" ta government spokesperson-i langzü.

**DAB nung ali**

**atsünga agiba aitsür**

Assam-i Mokochung district kübok Disputed Area Belt (DAB) nung ali atsünga agiba atema Cabinet senden nung benoka lemsatet aser iba mapa aitsüba metetdaksüogo.

Cabinet-i iba atema Assam sorkar den jembiteptsü aser Home Affairs o Forests Ministry tem dangi shidi zülutsü lemtet ta Minister John-isa ashi.

## Rajnath Singh-i Assam nung sepaitem den Diwali among



**Guwahati, October 30, 2024 (Agencies):** Bodbarnü Union Defence Minister Rajnath Singh-i Assam nung sepaitem den Diwali mongogo.

Sonitpur district kübok Tezpur nung Rajnath Singh-i 4 Corps headquarters nung benjung among.

"India aser China tsüngda Line of Actual Control (LAC) anasa tesem kar nung tangatettep kati aruogo. Nenoki tashi angaba

policy lir. Ajisüaka khenkhen tensa tamajung ajurur aser idangji asenoki asen arrtsü kümzüka ayutsüsa akümer. Sepaitem taginüba angateta sorkari yimjung mapa inyaksü" ta pai ashi.

"Sepaitemi tasütait aser bendanga agüja inyakba mapa linüki kodanga mamadoktsü. Alima nung India jenjang tajungba akümer aser iba ya Prime Minister Narendra Modi-i mangdang yua lenisüba aser Armed Forces tashi ajanga lir" ta Rajnath Singh-isa ashi.

Iba sentong nung Chief of the Army Staff (COAS) General Upendra Dwivedi, Eastern Command nung General Officer Commanding-in-Chief (GOC-in-C) Lt Gen RC Tewari, 4 Corps nung General Officer Commanding (GOC) Lt Gen Gambhir Singh aser Indian Army tongti ketdangsurtem aden.



### Nzau yimdak Chega-Gadi cum Mini Hornbill Festival tenzükogo



Peren District nung Tening sub-division kübok Nzau yimtsüung nung October 30, 2024 nü Chega-Gadi cum Mini Hornbill benjongmung amungdang MP Rajya Sabha, S. Phangnon Konyak-i o jembidang tangokba noksa nung angur.

**Dimapur, Mongputeni/Oct. 30 (TYO):** Zeliang nunger aser talisa Liangmai nüburtem asoshi benjongmung tulutiba, Chega-Gadi benjong October 30, 2024 nü Tening sub-division, Peren kübok Nzau yimdak tenzükogo, kong sentong akhumdong ama MP Rajya Sabha S. Phangnon Konyak aser Imtichuba Chang, MLA dena liasü.

Iba anogo tematiba tsüngremi temoatsü agüja alu junga rudaktsür aser anema yutsür ta nüburtemi amanga iba benjong ya amunger.

Iba benjong yagi tsürabur aser kibong kumer aliba jalatem aser adianutem tsüngta temeim tesendaktep tajungba kumshir. Iba anogo tsürabur, tebur adianu aser tebo tambu aser tanubu nunger temi pei jala, teyi-tenu

aser tamo nunger nem chityongtsü tajungtiba renema agütsür.

Benjongmung ayonger MLA & Chairman DPDB Peren, Namri Nchang-i iba sentong nung jembidang, iba benjong ajanga asen oshi-oben aser sobaliba ajungketa aser wazüka ayutsü lanurtem ajungmesotsüla, ta ashi.

Pai iba benjongmynger dang iba benjong tetetzü aser tera tejangja meteta amungtsü ayongzük aser sobaliba ya kin kati amanga amshiba aser tamangba yimsü ama mesayur saka tera aser ayak wazüka ayur, ta ashi.

Sentong akhumdong MP, S. Phangnon Konyak-ia nüburtem dang benjongmung nung shilem agitsü jaokba atema pelaba lemsatsep aser pei sobaliba aser ayak nung nüma danga tarutsü

jenjang ajungtsü asoshi ajungshitepa aser yaritepa aotsü ayongzüka liasü.

Iba sentong nung Tuensang Sardar 2 nungi MLA, Imtichuba Chang aser Deputy Commissioner, Peren, Hiazu Meru, NCS natia jembia liasü.

Sentong tenzüka Pastor Town Baptist Church, Tening, Rev. Kamwang Rentta ajanga sarasadem, NZPO President, Zandi Domta-i pela agizükba o jembi aser Asst. Professor, Central Institute Hindi Agra, Dimapur Centre, Dr. Thunbui-i iba benjongmung ratet lemsatsep aser Vice President, BJP Nagaland unit, Hurui-i melepzüing o jembia liasü.

Iba benjongmung nung sobaliba ken, tsüngsang aser yimya balala agi shilem agia liasü, koba October 31, 2024 nü tembangtsü.

### Nagaland Angh-i Chaga Gadi aser Langsimnyi benjong salem abener

**Dimapur, Mongputeni/Oct. 30 (TYO):** Liangmai aser Zeliang nunger adianu aser adianutsür ajunga dangi benjong salem abener, ta Nagaland Angh La Ganesan-i sangdong ka nung ashi.

Asenok Chaga Gadi aser Langsumnyi benjongtsü

adenshiba mapang asenoki tepela aser kati ka asoshi bilemetsüba tanüla agizükti. Asenoki asen sobaliba tajung wazüka yuti, telungjem aser tesendaktep nung tashi itshiti, ta ashi.

Asenoki achi-ajemba, ken

atenba aser tsüngsangba nung shilem agidang asenoki asenok ajak lungjemdaksüba jenjang lepa reprangti.

Na aser ner kibong nung tepela aser temeim lidakjang ta moatsür, ta Angh La Ganesan-isa ashi.

### FAC nung United Nations Day Lecture sentong ayongzük



**Dimapur, Mongputeni/Oct. 30 (TYO):** Fazl Ali College, Mokokchung indang Political Science Association (PSA) ajanga October 30, 2024 nü United Nations Day nungtem nung Sixth Annual Lecture ayongzüka liasü.

Iba sentong nung Dr. Sentikumla, Assistant Professor of Law, Nagaland University ajanga "Situating Rule of Law in UN Sustainable Development Goals" onük nung ajemdaker jembia liasü.

Iba mapang lai UN tenzükba tera aser Development Decade nükjidong indang rasaa ashi. Lai UN indang Sustainable Development Goals (SDGs) indang kanga junga rateta ashi aser aliba nung 'economic, social aser environmental sustainability' takok angutsü asoshi Rule of Law (SDG 16) ya kanga tongtipang ta ashi.

Sentong nung Political Science honours agir Semester 5 nungi Opangalanger Longkumer aser Semester 3

nungi Temjenmerang Imchen nati North East India Model United Nations (NEIMUN) 2024 nung adendang ajangshiba aser angazükba lemsatapa liasü.

NEIMUN 2024 ya Don Bosco Institute, Dimapur nung October 18-20, 2024 anogotem UNSC Resolution 2250: "Youth, Peace, and Security" nung rangloker ayongzüka liasü.

Iba sentong Kushemyimjong Chang, Assistant Professor, Political Science menden liasü.

### Nagaland Angh-i Diwali benjong salem lemsatsep

**Dimapur, Mongputeni/Oct. 30 (TYO):** Diwali nung asenoki tesangwa benjong amungba mapang ajak dangi salem abener, ta Nagaland Angh La Ganesan-i sangdong ka nung ashi.


Diwali tesangwa agi asen ki aser asen mulungjang sangwadaktsüdang nenok ajak talubosa, tia tajung aser

yimchiyimjung nung lidakjang ta moatsür.

Iba Diwali ajanga maongka tasen aser tayongzükbatem ajangtetsü asoshi tashi agüjangma.

Diwali tanüla ajanga asen mulungjang nung dangar dang meimba, telungjem aser teimla tasen adokdakjangma, ta Nagaland Angh-isa ashi.

### 5th Nawada IFF nung 'Enter My World' ajanga sempet angu



**Dimapur, Mongputeni/Oct. 30 (TYO):** Bihar state kübok Nawada nung October 27, 2024 nü 5th Nawada International Film Festival Screening and Award Ceremony aliba mapang Abiogenesis ajanga yangluba musical feature film 'Enter My World' yagi Best Feature Film Award ngua liasü.

Enter My World ya 'folk era fiction' ka lir, koba Arenla Subong ajanga zülua direct asü, koba jangratemtsüka lir, kechi aser ibai jangratemtsü aketba otsü den musical yimya tasen ka lir.

Ibai drama ka lir aser iba otsü zülula aser la den yariteper tem Naga nunger yimtsüung ka nung arem nung research aoba mapang shikarir kari itdangiter tem südi ta bilemer apuba indang lir.

Iba film tatem nung keyi tanüla alir nisung ka aser pongzü tanüla alir nisung ka rarateper aser otsü zülur aser la den yariteper tem jena aotsü meranger.

Naga nunger sübosolemtsü aser sobaliba tajung den Nagaland alinük tebour ajungba ajanga film ya asangsang amai lir. Iba film nung atenba ken ya Naga Howey kensü nung aden aser script ya English oshi nung lir.

Iba film nung tongti shilem agirtem ya Zukhoi Chuzho, Areinsa Longchar, Arenla Subong, S. Chisi, Toshi Lenda aser Moa Subong nungertem alitsü.

Iba feature film ya YouTube nung <https://www.youtube.com/watch?v=2G17WcxJDEU&t=428s> nung reprangtetsü.

### DC & DEO Mokokchung ajanga Voter Registration ochishia inyaktsü ayongzük

**Dimapur, Mongputeni/Oct. 30 (TYO):** Deputy Commissioner and District Election officer, Mokokchung, Thsuvisie Phoji ajanga Mokokchung District nung aliba nübur ajunga dang voter registration mapa ochishia inyaktsü, noksa, documents tai/tiazü mesüra voter information tiazü magütsütsü metetdaksü.

Iba ama mapa inyakba ya electoral law nung aibelen tulu lir aser electoral process nung tetsükdaksü agütsür.

Representation of the People Act, 1950 indang Section 31 nung voter registration atema metetsümonga osangtsüsang, documents tai agütsüra, mesüra application tiazü agütsüra ozüing agi merenshitsu ta ashia lir, ta DC & DEO Mokokchung ajanga metetdaksü.

Application tiazü agütsüba mesüra agütsüba nung shilem agirtem Representation of the People Act, 1950 indang Section 31 nung mela aliba ama küm ka tashi tepuokdak ayutsü, senchi achitsü mesüra temerenshi anaprong alitsü

Aibelener tem tarutsü nung electoral roll nung inoktsü atema applications magütsütsü, ta ashi.

Maneni AEROs ajunga dang application Forms ajunga kanga junga jangjatsü totuyuba agütsü. Osang meshidak agüja lir südi ta temulung meleme bilemba applications tem mera balala agütsü atema tekeraba nung osang agütsütsüla.

Nüburtem aser political representatives ajungai electoral roll nung inoktsü atema applications tejangja aser electoral laws nung aliba ama agütsütsü ajungshir. Osang mesüra documents tiazü agütsüra ozüing agi mela aliba ama merenshitsu, ta DC & DEO Mokokchung ajangasa ashi.





October 30, 2024 nü New Delhi nung linük tatong Tir, Jagdeep Dhankhar-i taoba mapang Tir, Ram Nath Kovind den par kibong ajurua Diwali benjung salem lemsatepba mapang tangokba noksa nung angur.

### Linük tesem aika nung petrol aser diesel jenjang ajemtsü

**New Delhi, Mongputeni/October 30 (Agencies):** Oil Manufacturing Companies (OMCs)-i petrol pump dealers nem agütsüba Dealer Commission tutsütsü telemtetba agiogo, anungji linük tesem tezülen aliba tesem aika nung petrol aser diesel jenjang ajema akümtsü, ta Bodhbarnü osang ka ajanga metetdaksü.

Indian Oil Corp Ltd-i X ajanga, “#IndianOil-i Dealer Commission reprangshiba sangdonger (October 30, 2024 nungi mapa küma benoktsü). Iba ya ajanga Retail Selling Price of products nung mekongshitsü. Iba ya ajanga customer service tajungba akümba den külemi retail outlets nung inyaker staff tem tajangzük angutsü,” ta metetdaksü.

“Iba dak alia ‘Linük Tama’ südaktsüba tangatetba nung onoki linük tesem ajaklen petrol

aser diesel jenjang dalangba agi agütsütsü atema inyaka aruba tang süngjang atanger,” ta Indian Oil-isa metetdaksü.

Ano külen Petroleum & Natural Gas Union Minister, Hardeep Singh Puri-ia iba sangdong pelaa agizüka X ajanga, “Dhanteras benjung anogo nung oil companies-i petrol pump dealers nem sempet agütsüba ya kanga pelaa agizüker! Küm tenet tashi takhangba agüja aruba atangji ataloktsüogo,” ta metetdaksü.

Paisa, nüburtemi service ano tajungba angutsü saka petrol aser diesel jenjangbo matutsü, ta metetdaksü.

Union Minister-i, “OMCs-i petrol pump dealers atema Dealer Commission tutsübaji onoki pelaa agizüker. Ano külen intra-state freight rationalization ajanga (OMCs indang Petrol aser Diesel nungi meta talang

pilar aliba) kanga tezülen aliba tesemtem nung petrol aser diesel jenjang ajemtsü. Election agitsü aliba state tem aser constituencies nungbo tesülen ang mapa küma benoktsü,” ta metetdaksü.

Odisha, Chhattisgarh, Himachal Pradesh, Arunachal Pradesh, Uttarakhand aser Mizoram densema state aika nung totzü jenjang ajemtsü.

Tatishitsü agi, Odisha nung kanga tezülen aliba Kunanpally aser Kalimela na nung petrol litre ka nung sen 4.69 aser sen 4.55 ajemtsü aser diesel litre ka nung sen 4.45 aser sen 4.32 ajemtsü. Iba denji kasa Chhattisgarh kübok Sukma nunga petrol litre ka nung sen 2.09 aser diesel litre ka nung sen 2.02 ajemtsü. Chhattisgarh nungsa Bijapur, Bailadila, Kateykalyan, Bachel aser Dantewada district tem nunga totzü jenjang ajemtsü.

### Wayanad Lok Sabha by election nung candidate 16-i tokteptsü

**Wayanad (Kerala), October 30 (Agencies):** Kerala state kübok Wayanad Lok Sabha constituency by election nung candidate 16-i tokteptsü; candidates teimbaka independent candidates lir.

Wayanad Lok Sabha by election nung tongti candidate asemji United Democratic Front (UDF) nungi candidate, Priyanka Gandhi Vadra, Left Democratic Front (LDF) nungi Sathyan Mokeri aser BJP-i aniba NDA nungi Navya Haridas nung lir.

Iba menden atema tokteptsü asoshi tenüng agüja alirtemi tenüng agientsü asoshi tatembangbuba anogoji Bodhbarnü liasü.

Taküm Lok Sabha election nung Congress lenir, Rahul Gandhi-i Rae Bareli aser Wayanad menden naprongla nungi takok ngua liasü. Iba sülen pai Rae Bareli menden shimba ajanga Wayanad Lok Sabha menden atema tang by election agitsüsa akümer.

Congress General Secretary, Priyanka Gandhi-i election aika nung party candidates atema nübo yimja aruogo, ajisüka lai tang ang mezüng election nung tokteper.

2014 küm Lok Sabha election nung Sathyan Mokeri-i Wayanad menden nung toktepa liasü saka pai taoba mapang Congress candidate, M I Shanavas matsüngdang tamakok ngua liasü.

Communist Party of India (CPI) nung lenir tain, Sathyan Mokeri-i aluyimba sector nung tebilemtsü onüktem bentetsü atema mapa tajung aika inyaka aruogo.

Ano külen BJP candidate, Navya Haridas ya tamalen Kozhikode Corporation nung küm 10 shi councilor inyaka liasü. La ya yangji BJP parliamentary party lenir lir.

La BJP Mahila Morcha nunga state General Secretary inyaker.

2021 küm la mezüng Kerala assembly election nung Kozhikode South menden nungi toktepa liasü saka Congress candidate, Ahammad Devarkovil matsüngdang tamakok angu.

Priyanka Gandhi, Sathyan Mokeri aser Navya Haridas nungir dak alia tanüngba candidate 13 nem election symbols agütsüogo, ta Wayanad district administration-i metetdaksü.

Wayanad nung Lok Sabha by election ya November 13 nü agitsü aser November 23 nü vote zünga osang sangdongtsü.

**Andhra Pradesh nung angati gas cylinders scheme tenzükogo**

**Amaravati, Mongputeni/October 30 (Agencies):** Bodhbarnü Andhra Pradesh Chief Minister, N Chandrababu Naidu-i Deepam-2 scheme tenzüktsüogo; iba scheme kübok sensaker kibongtem nem angati gas cylinders agütsütsü.

Iba scheme ya state sorkar “Super Six” welfare programmes shilem ka lir. Iba scheme ajanga küm shia state senpong nungi sen crore 2,684 indoktsü.

State secretariat nung iba scheme tenzüktsüba sentong nung jembidang Chief Minister Naidu-i Hindustan Petroleum, Bharat Petroleum aser Indian Oil ama petroleum companies nungi ketdangsertem ket nung sen crore 894 indang ‘checks’ agütsü.

Deepam-2 scheme kübok temsüa alir kibong shia nem küm shia gas cylinders asemsem angati agütsütsü (ita pezü shia gas cylinder kaka agütsütsü).

Iba scheme kübok temsüa alirtemi gas cylinders senji agütsütsü saka state sorkari ghonda 48 majungdangsa iba senji meyipa agütsütsü.

October 29 nungi tenzüka iba scheme atema applications agütsü tenzükogo.

Iba scheme tenzükba sentong nungji Civil Supplies Minister Nadendla Manohar den Tenali, Eluru aser Vijayawada nungi iba scheme atema temsüa alirtem aika aden.



October 30, 2024 nü New Delhi nung osangbenertem den jembiba senden ka nung Delhi BJP Tir Virendra Sachdeva den BJP MP tem- Bansuri Swaraj, Ramvir Singh Bidhuri, Kamaljeet Sherawat, Praveen Khandelwal, Harsh Malhotra aser Yogender Chandoliya nungir tangokba noksa nung angur.

## MULUNGNEN O

Onoki teti meima aliba kinungtsü aser ojala **Asür Tiatula** (W/o Tiatemjen Mangmetong), mapang tatsüka shirang yipden nung aliba mapang nungi tenzüka la akümlü tembangba maparen tatem tashi kija, kibong, lokti tentet, Arogo, yimden, Hospital balala nung Doctors aser stafftem shirnokisa sarasadem, nübu, rongsen, senti mapang aser yimya balala nung yaritepogo, nenok ajak dang ozü mulungjang taroktiba nungi kanga pelaba lemsateper.



**Tasüba: 25 Oct. 2024**

Onok shisabulu khuret tulu bener mulung zürep tia nung alidang nenok temeim mapa aser aria bilemba yimyatem agi onok tasü itdakja mulung sunepstüogo. Nenok nisung shia dangi onok tsüngdong arua pelaba meshitetba atema kanga sasar, saka asen Teyanglur Tsüngremi nenok mapa tajung metetta moatsüts ta amanga iba mulungnen O lemsateper.

~ Temeim Kinungbo, Chirnur, Semchisemnur, Sosemtem aser Temeimbatem.



**बैंक ऑफ बड़ौदा**  
**Bank of Baroda**

**CIRCULAR ROAD BRANCH**  
Ground Floor, Faith Building,  
Near Khermahal Traffic Point,  
Dimapur, Nagaland- 797112  
Email: vjdima@bankofbaroda.co.in

**[Rule 8(1)]**  
**KIOJEN AGIBA NOTICE (For Immovable Property)**

Securitisation and Reconstruction of Financial Assets and Enforcement of Security Interest (Second) Act, 2002 aser Section 13(12) nung agüja aliba tashi aser Security Interest (Enforcement) Rules, 2002 nung **Rule 3** nung agüja aliba tashi amshia **Bank of Baroda, Circular Road Branch, Dimapur** nung Authorised Officer-i **03.03.2022** anogo nung Demand Notice ka ajanga sen apurtem –

- Mrs. Kaniho Kiba (Co-obligant)**  
**W/o Kihoto Kiba (Borrower)**, H/No. 49, Ward No. 16, Thaheku Village, Dimapur- 797112, Nagaland.
- Ms. Mary Kiba (Guarantor)**, H/No. 292, Kuda-B, Khel-A, Mao Colony, Dimapur- 797112, Nagaland.

dang notice agütsüba anogo nungi tenzüka anogo 60 tsüngda notice nung shia aliba **Rs. 25,87,731/- (Rupees Twenty Five Lakhs Eighty Seven Thousand Seven Hundred Thirty One Only)** agüjang, ta metetdakja liasü. Sen apuri sentsühji magütsütet nung sen apur aser public dang, tsünglanglen sign süa aliri iba Act nung Sub section (4) of Section 13 nung agüja aliba tashi aser Security Interest (Enforcement) Rules, 2002 den Rule 8 nung ajemdaker **2024 küm October 25** anogo nung tsünglanglen shia aliba kiojen agiadokogo, ta sangdonger.

Talisa sen apur aser public dang iba kiojen dak sendakba nung kecha inyaksangshi masütsü metetdaksür, mesüra Bank of Baroda-i **Rs. 25,87,731/- (Rupees Twenty Five Lakhs Eighty Seven Thousand Seven Hundred Thirty One Only)** denji külemi **29.06.2024** anogungi tenzüka sen tetemlok aser tanga charges ajak meshitsü. Sen apur dang Section 13 kübok sub-section (8) nung ajemdaker mapang shidak nung item kiojen alanzüktsü metetdaksür.

**Kiojen osang tejangja:**  
Thaheku Village, Dimapur, Nagaland nung Mr. Kihoto Kiba tenüng nung aliba Patta No. 47, tasazük 4388.90 sq. meters kimong aser kiojen ajak.  
Bounded by:-  
**North:** Plot of Shri Heloto, **South:** Plot of Sutoli, **East:** Approach Road / Visheto Yephtho, **West:** Mr. Dominic.  
**Date:** 25.10.2024  
**Place:** Dimapur  
**Authorised Officer**  
(Bank of Baroda, Circular Road Branch)





## TIR YIMYIM YIMOBILEM (EDITORIAL)

DIMAPUR YANGTEPNÜ, OCTOBER (MONGPUTENI) 31, 2024

### Tesüleni odaktsüba mapatem

**A**lima nung alir kin aser nübortem ajaki tajakleni renloka onür saka mouteter ta asüba kin aser nübortem kar lir, item rongnung asenoki anguba, angashiba aser ajangshiba rongnung tamangba yimsü tenüung nung tashiyim amshiba kintem, yimten nung ajak tanishir kümnüba nübortem, kin kidong tsütsü tantsü aser tambu kümnüba rakteper kin aser nübortem aser ano kar ochimashi mapatem agi mapang aser nübo amajok nung lalutsüsa akümba kintem asütsü. Itemji kar Muslim limatem, kar Africa nung aliba kintem aser karbo asenok ama Naga kintem aser Naga kintem rongnunga, ano talisa, Ao kin asütsüa akok. Tangar kintemji khen yutsür tanü asenok mapang, nübo aser rongsen endokba mapatem indang bilemdangra, asenok belemtsüsa ajuruba mapatem ya teimbaka alima yimya agi bener arutsüba timtem aser tebilemstütem masü saka asenoki asenoksasa yangluba tebilemstütem agi asenok tejakleni onüseta moutet metetmeteta tesüleni aoba asenoki meteter. Aji oda, sobaliba nung yimkümer raktepba, kin kidong tsütsü tambu raktepba, arogo akümba nunga tesü süner mali, yimten nung ochimashiba agi terenlok mapa inyadaktüsü asoshia nübortem longkak aittüsü akümba, arogo nunga ochimashiba mapatem agi amajok nung nübortem mapang aser rongsen lalua nübo endoktsüsa akümba mapatem ajak ya asenoki yanglutetba tebilemstütem lir. Tangarbo, alima nung alir nungdak peritsütsü atema chiyongtsü, mozü aser tagitarutsü osettem tasen tasen adokdaktüsü aser yanglutsü atema tokolok belemer, rongsen endoker aser nübo atsüker. Ajisüaka, asenokbo kin kidong mangatettep ken o jembitsü, arogo nung inyaksaba mapa bentettsü aser yimteni terenlok mapatem meinyakba anema longkak aittüsü asoshi lokti senden jateptsü, okadaki aotsü aser nübotsüka longkak aita amongtsüba mapatem nung dang asenok mapang endoker aser tokolok belemer. Item jagi asenok mazünger aser melungjemeteter. Joko tangarbo, ita yabo anameta yutsür tanga petinutem nungi rongsen bushia bener alua agitsü aser tesülenbo petinutem nunga yim akümtsü yima tuli aluli ta senzür, ajisüaka asenokbo lipok otsü jembiba agi, ano long nungia junga mepoktet, tagitsü mapa inyaksü atema mapang mangur aser ochimashi ken o bentet dang mapang agi magishir. Aji oda, lokti aser arogo atema senotsü bushilenbo kanga meranga jajar saka pei asoshibo mapa maka kazütepba purtemji asenok lir. Iba jagi lokti aser arogo takar saka kija kibongbo sensaker, anungji sensakeri takar meyong auyar, aji nisunger yimya dak keta lir. Tangarbo pei mapa aser business anogo nung ghonda ka toktsür aotsübaji tasak aser takoksa tulu, saka asenokbo anogosa anogo o o dang jembia alitsübaji asenoki mapa tuluka inyaker ama bilemer. Joko, asenok tejakleni onüra kechi jembitsü (?) ta masü kechi inyaksü (?) ta asenoksasa asüngdanga mapa inyak tenzüksüla. Tama tesüba ya masü aser tambu-tantsüa masü saka shibai asen nübor nungdak agütsütettsü ta asübajiang asenok asoshi dang masü tangar asoshia nungdaker. Aji oda, tamapur aser yimkümer asüyonga tangatetba nung aser kaa aitba nung tangar tesüpur memenepa, tamapur asübaji meinprongtsü ka dang akümtsü aser yimkümer agi yimkümer memesük pei temeten yoka pi kübok alitsüsa akümtsü. Aji oda, pei dak aketba tashi aser sempet agi peisasa inyaka sen mekümdaktüsetra ochishia melitettsü. Iba timtemji tanü asenoki ajurudagi. Joko, asenokbo mezünger, tamapur, tambuba, tantsüla ta asüba konang aser ochimashi aser menendakba jakla aser mapatem, koba agi asenok tejakleni aotsü nokdang, item ajakji onokbo magili ta ser asangsang nung tejakleni ao tenzükd. Idangji dang asenok melongjemli asüyonga longjemtsü aser ochishia teli asüyonga maa ta ochishia alitsü aser tesüleni ludi asüyonga ma ta tejakleni orr alitsü.

## OLEMSABANG

### ABAM NUNG NÜTSÜNG LENISÜBA (LAY LEADERSHIP) NUNGDAKBA OCET ZÜLUBA NUNG O-SEMLOK

~ L. Kika Pongener.

Tir Yimyim 24th October '2024 adok olemsabang nung, lennir Rev. Dr. Nuklu Longkümer-i züluba ocet "ABAM nung nütsüng lenisuba (Lay Leadership) nungdakba", Ao Baptist arogo züngsem tajung ajaki bilemdangtsü onuk züluba, tanü tensa den kanga tapet aser nütsüng-nübur aikati aginua bilema aliba kanga tongtipang onuk ka lemsatepa zülüogo ta kanga temulong sua züngogo. Asenok ajaki metet, ABAM ya laishir kisung agi longjemmer akümba mungdang ka masü, ABAM küpok lim arogo nung züngsem tajung, laishir aser lai-mashir (Theologian and non-theologian) arogo nütsüng ajunga longjemmer akümba mungdang ka lir. Anungji ABAM anitsü atema Tir/President-jibo lai-mashir (Layman) arogo nütsüng rongnungi takotet lennir tajung ka shima anidaktüsübaji kanga tima ta nütsüng-nübur aikati bilemer aser aginur. Kechiyong ABAM Executive Secretary-jibo teti agia laishir mongin/takotet (Theologian) rongnungi ka shima agitsübasa aser yamaji agia arudagi. Kodang ABAM President aser Executive Secretary anapronglaji Theological Background nungi dang shima agidir, ABAM-ji 'Laishir mungdang' ka amai küma-adoker.

Alima asünungji koba telok nung sudir suaka, tamang yimsu dak sentakba teloka suang, loktiliba nunga suang, teti dangpo sunep-sunepa tangatettep tajung nung malitsü, mapang kar nungpo ken o obang-mapu adoktsü. Ano mimchiri dang tenzüker asünungji, mapang kar nungpo metokmeperi, tashimait aser aibelena inyaksemtsü akok, aser mapang kar nungpo iba ama tensa tiaji denjia aruogo sudi. Iba ama tensa tia ajurudangji yimya agi Tir/President jagi metongshitsütsü aser ken o-a alangdangtsü. Ajisuaka, kodang Tir/President-ji laishir/sannuker ka nokdaka lidir, laishir/sannuker kati arok-aroka metongshitsütsü/arrtsütsübaji tsükdaker aser külem tenzüker ka dangji aochitsüsa akümer. Ajisuaka, tensa aser maparen jagi indang-indanga memetongshitepra mungdang inyakyimji masüngtettsü aser memelenshitsü. Anungji iba ama tensa tia ajurudangji tetsükdaktsü kecha makai timyim agi metongshitepa anitsüsa, ABAM Tir-ji 'Layman' ka asübajisa kanga agi tajungtiba asütsü ta nütsüng-nübur aikati bilemer aser aginur. Aji oda, iba tebilemba lemsatepba ya ocet zülur kija tebilemba aser taginuba masü, saka nütsüng-nübur aika tebilemba aser taginuba ola amai bilema agidaktüsünur.

*(Maneni asüng adok nung...)*

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



## Angola nung SIM USA nungi missionary, Beau Shroyer tepset



Missionary, Beau Shroyer den par kibong noksa nung angur.

**October 30, 2024:** Detroit Lakes, Minnesota nung taoba mapang police officer Beau Shroyer, Angola kubok Lobango yimti nung missionary teinyakdak mapang tepsetogo.

Pa den pa kinungtsü Jackie aser par chirmur pongu ya SIM USA (Society for International Ministries USA) nungi missionary tem lir.

Ita ishika tejaklen par kibongi Tenla kidang security dak sendakba tebilemtsü kar lemsatepa liasü.

Taoba Hokolbarnü (October 25) pa tepset; pa arrshi küm 44 liasü.

SIM USA nung Tir, Randy Fairman-i, "Hokolbarnü, October 25 nü phone call ka ajanga, Angola nung Yisu tenzükba mapang nung Beau Shroyer tepsetogo aser tang pa Kümtedakba den külemi lir, ta kü nem metedakja liasü," ta ashi.

SIM USA ya global missionary organization ka lir, aser iba organization yagi Khrista osangtajung prokba nokdangba tesemtem nung missionary mapa inyaker.

Honibarnü SIM USA-i sangdong ka ajanga, Fairman tayimtsü ajanga Lubango-i ogo, ta metedaktsü. Lubango ya Angola nung yimti tulutibatem rongnung tanabuba jenjang nung lir.

Fairman-i sangdong ka ajanga, "Beau aser Jackie Shroyer na den par chir pongu ya coronavirus wara sülenbo SIM USA nungi mezüngbuba missionary tem liasü," ta metedaktsü.

Fairman-isa, "Tang ama mapang ka nung onoki aser Jackie den lar chirmurtemi Yisu dak dang tamang akatsüla. Ya kechiba atalok, ta Pa dang masüngdangtsüla saka Pa dak dang tamang akatsüla. Iba ya tejashi mapang ka saka iba ya ajanga asen tamang jenjang ainer. Ni tang tashi nungbo Jackie den mejembi, anungji osang tejangjabo memetet," ta metedaktsü.

Beau Shroyer aser par kibong mapang talangka Lakes Area Vineyard Church nung züngsemtem liasü. Iba Arogo

nung tongti pastor, Troy Easton-i, missionary ji koma asüar mejangja, ajisüaka paji kari tepset ta jangjaogo, ta metedaktsü.

Tenla kidang Arogo züngsemtem den jembidang pastor Troy-i, "Yashi, Hokolbar, October 25 nü SIM USA nung Chief Personnel Officer aser General Counsel Mark Bosscher-i, 'asen adianu aser medemer Beau Shroyer Angola, Africa nung missionary teinyakdak mapa tepsetogo' ta onok nem metedakja liasü," ta metedaktsü.

Paisa, "Ni pastor (Shroyer) kinungtsü den jembioogo; la aser lar chirmurtembo junga lir aser kari parnok anepaludar," ta metedaktsü.

Taküm June ita nung Lubango nung missionary mapa inyakba metedaktsü dang Jackie Shroyer-i, "Küm asem tejaklen ozü kibong Angola-i ao. Ozü kibong atema ibaji bendangleni oa mezüng missionary inyakba liasü," ta lemsatepa liasü.

Laisa, "Iba yimti nungji mezüng küm onoki Portuguese oshi aser sobaliba angazük. Iba denji külemi malaria agi shirangba den security dak sendakba tebilemtsü kar liasü. Onok tanga wara-a balala agi shirang. Onoki tanükertem dak melung melemtemi liasü. Aonung ki mita reprangba tatalokba aiben liasü," ta metedaktsü.

"Parnok sobaliba bentshia alitsü onoki merang. Onoki tayongzükba aika ajangshi aser tatalokba balala ajanga tetsübu nung liasü," ta laisa metedaktsü.

"Yangi (Lubango) aliba ya onok atema tayongzükba lir aser küm ka abensaogo. Onoki organization headquarters-i aoba sülen osang metedaktsü. Ozü tenetpronglai meyipa aoba sülen maneni mission mapa inyaktsü matateti liasü," ta lai metedaktsü.

June ita nungsa missionary, Beau Shroyer-ia, Angola nung sorkari naring lu ka anasa ministry nem kimong ka lemsaktsü, aser onoki kiojen asü tenzük saka ozüng alema inyakertemi aiben amakba

ajanga tetsükdaktsü adoka liasü, ta lemsatepa liasü.

"Tanükertemi anüngdang-aonung piyong naring luji anüker, kechiyong auertemi naringji auyatsü meranger. Tatalokba ka nungbo auer ka kaset. Iba tesem nung sensakerterem aika lir, anungji parnok taküm alitsü atema tasü-a metsübu naring auyatsü meranger," ta Beau Shroyer-i lemsatepa liasü.

Taküm September ita nung U.S. State Department-i sensotem dang Angola linüki maotsü tekümdangtsü osang metedaktsür liasü. Iba mapang nungji Shroyer'er kibongbo Angola nung liasü.

US State Department-i US sensotem dang, "Ozüng alema inyakerterem jenti lir, raraba hadir amer auyar, gari rakzükker aser nisung tepsetba kanga bulua ataloker. Ozüng alema inyakerterem azüoktsü atema police dak tashi mali," ta metedakja liasü.

## Myanmar nung STF-i Pastor Raymond Koh samaba report tasen ka agütsü



Raymond Koh

**October 30, 2024:** 2017 küm Malaysia nung pastor Raymond Koh samaba dak sendakba osang tasen ka jungkai adokogo, ta International Christian Concern (ICC)-i metedaktsü.

Iba ken o bushisüngdangba Special Task Force (STF) nung Chairman-i, asenoki bilemba ama Raymond Koh ya samaba masü saka ozüng alema inyaker police officers kar ajanga asütsüa akok, ta metedaktsü.

Taoba mapang STF chairperson, Datuk Abdul Rahim Uda-i, "Pastor Raymond Koh ya samaba masü aser iba ken o nung tongti melung melemtemi alisangji taoba mapang police officer, Saiful Bahari Abd Aziz lir," ta

## ANOGO ABEN TSÜNGREM DEN

### Pai Sang Raksatsü

- T.Ken 124:1-8

"Tsüngrem asenok asoshi lira, shibai asenok anema arutsü" ta Pauli Rom 8:31 nung asüngdang, aser asenoki telangzübaji metet. Tsüngrem asenok asoshi lira shingai asenok anema arutsü makok. Ibaji T.ken 124 omenji lir. "Kibuba shiba asen tsütsü liasü Pa ka masü asübo. Kodang nisungtemi asen anema apuso: Kodang parnok asenok anema ain adok: idangto parnok asenok taküm meyoker lila" (t.2,3).

Kechiaser Tsüngrem asen tsütsü ali nung, nisungi asenok chimatsü makok. Ken züluri pa tsükchirtem molusongzü aser shirem den medemdanga jembi, shibai pa dang punglok aser chima. Asenok chinüba nüburtema lir. Kodang nisungtemi na tembangdaktsütsü merangdir, Tsüngremi parnok anendaktsütsü ta bilemtetang.

Saka nisungi na mechtsü. Tiai na mapanger. "Idangto tzütemi asenok mobanger lila, asen taküm madak ayong yima orr lila. Idangto tzü tesashi asen madak orr lila" (t.4,5). Tzütem asen tanela madak yima aodang asen taküm arakseter ama bilemer. Saka Tsüngrem asenok tsütsü ali nung tiai asenok memobangtsü.

Ken züluri tia agi chimaba aser araksetba noksaji melenshia sang nungi jenbu ta zülü. "Ozü kümertem sang nungi ozü ka ama, aser asenok jentetta lir" (t.7). Tsüngremi asenok araksetba aser chimaba nungi dang kümzükker. Pai asenok techiokdang chioker masü saka satan sang raksatsür. Asenoki Kibubai aniba nung anidak tashi Satani asenok tanaben aputsü makok.

Takümi na techimadaktsü. Takümi na teraksadaktsü. Satani na tanaben tepudaktsü. Tsüngrem ne den lira shibai na anema arutsü ?

Nai tebilemtsü ajurudang Tsüngrem ne den lir ta tamadok. Tsüngrem ochi tenangzüba ne den lir. Tsüngrem dak amangang. Pai na kümzüktsü.

STF report ajangasa police nem ano tashi tuluba agütsütsü nüngdakba aser sorkar matsüngdang benoka aliba Independent Police Complaints and Misconduct Commission (IPCMC) ji agizüktsü nüngdak, ta sayur.

Tawa Ministry of Home Affairs (KDN)-i, sorkari Pastor Raymond Koh'er kibong aser lawyer tem nem pastor Koh samaba indang Task Force report ka agütsütsü ta metedakja liasü.

Tamalen Special Task Force-i agütsüba report tera melenshia sülen pastor Koh'er kibong aser lawyer tem nem agüja liasü.

Ajisüaka KDN-i, original report nungji 'watermarks' lir, kechiyong ibaji sorkar indang official document lir aser ibaji Official Secrets Act 1972 aser Security Directive (Revision and Amendment 2017) kübok lir, ta metedakja liasü.

August ita nung Malaysia High Court-i sorkar dang pastor Koh samaba report ji Koh kinungtsü, Susanna Liew nem agüjang, ta tuyua liasü.







# Ukraine o Russia tsüngta energy plants nung amakba anentsü jembir

**Kyiv/Moscow, Mongputeni/Oct. 30 (Agencies):** Ukraine aser Russia na kati ka indang energy facilities nung tayimtsü amshia amakba anentsü asoshi jembishinü tenzükba mapang lir, ta iba ken o meteta alir nisung kari Financial Times dang ashi.

FT dang Mongulbar aonung osang agütsür tem rongnung Ukraine ketdangsürtem dena lir, aser Qatar tetsüngtai ia August ita agreement ka tera agi merenem aliba indang Ukraine-i jembishinü tenzüksü meranger, ta ashi.

Iba ita Kyiv sepaitemi Russia indang Kursk region telungi oa amakba yong iba jembishinü anentsüsa akum, ta osang ajanga FT dang ashi.

“Langka kar tanaben tenzüksüshitsü atema jembishinü

tang ang tenzükba mapang lir. Energy facilities indang jembiba mapang lir,” ta diplomat kati iba osangkaket dang ashi.

Kremlin, Russian Defence Ministry, Ukraine Tir Volodymyr Zelensky indang office aser Ukrainian Defence Ministry nungibo osang kecha agüja mali.

Moscow-i 2022 küm nungi kidanger linük nung tashi ajak amshia amakdang Ukraine indang power capacity shilem tuluka raksatsüogo mesüra rakzükogo, anungji Kyiv ya nuclear power facilities aser Europe nungener bener aruba energy nung metaloka alir.

Russia-i Ukraine indang energy infrastructure shilem tesa dang ka dak tema raksatsüogo, ta taoba ita European Commission

President Ursula von der Leyen-i shia liasü.

European Union-i capacity 2.5 GW yanglushitsütsü nükjidong lir, koba linüki nüngdakba shilem 15 shi lir, ta lai shia liasü.

Rara tenzük dang Ukraine ket nung tashi tait long-range weapons meliasü, saka tangbo parnoki long-range attack drones yanglua itemji amshia Russia linük telung nung totzü atsüdak, power plants aser military airfields nung amaker.

Energy facilities kumzuka ayutsü asoshi züngzüktepba ajanga Russia-i yimjung asoshi jembitsü mulungtsü, ta Zelensky-i October ita tetenzüklen FT dang shia liasü.

Moscow-ia yimjung aginer ta ashir, saka parnoki conditions yangluba Kyiv-i magizük teter.

# Australia-i missile yangluba jenjang ajungketshitsü



**Canberra, Mongputeni/October 30 (Agencies):** China-i South Pacific nung intercontinental ballistic missile (ICBM) ka tendangba aser Asia Pacific tesem ya “missile age” kati ayaoka aiba mapang Australia-i parnok indang missile defence capability jenjang ajungketshitsü ta shiogo.

Missile defence aser long-range strike capability taliba kümdaktsütsü asoshi Australia sentong lir, aser parnok indang security partners United States, Japan aser South Korea nung den regional stability atema teka amteper inyaksü, ta Australian Minister for Defence Industry Pat Conroy-i Bodhbarnü ashi.

“Onoki kechiba missile tali nüngdaker? United States aser China na tetoktepba ya Australia indang security environment atema tongtibangiba feature ka lir,” ta pai Canberra nung National Press Club dang ashi.

Conroy-i ashiba agi, parnok meketa aliba tesem ya tang missile age tasen kati ayaoka aiba mapang ka lir, kong missile ya amokmerentsü atema hadir ka kümogo.

Pai, China-i September ita ICBM ka tendangogo, koba 11,000km (6,835 miles) dak tali yima or Australia northeast len Pacific Ocean nung tsüka liasü, ta ashi.

“Onoki iba ballistic missile tendangba süoki ia bilemba lemsatepogo, talisa iba missile South Pacific-i aitba indang

ashishiogo, kechiyong Treaty of Rarotonga nung Pacific ya nuclear weapons-free zone ka asütsüla ta shia lir,” ta pai osangbenertem dang ashi.

Australia-i parnok indang navy destroyer fleet tem nung SM-6 missile tem amshidaktsütsü aser iba ajanga ballistic missile defence agütsütsü, ta pai ashi.

Kümtem tsüngda Defence nung sen aika intokba Asia Pacific linüktem rongnung Australia-a ka lir.

Australia-i parnok indang surface fleet kanga kara yangluyonga aoba den United States aser UK na den longjemer AUKUS kübok stealthy nuclear-powered submarine tem yoktsü Australia sentong lir.

Defence Minister Richard Marles-i ashiba agi, linük nung missile takaratiba nung yanglutsü aser linük atema long-range missile tem alitsü asoshi Australia-i “blueprint” ka sayadar.

Iba ita tetenzüklen Australia-i, navy atema SM-2 IIC aser Raytheon SM-6 long-range missile alizüksü asoshi US den sen 7 billion Australian dollar (\$4.58bn) alang tenangzüktepba ka yangluba sangdongogo.

Australia-i taoba mapang ashiba agi, taruba küm ter tsüngda missile alitsü aser missile defence dak sendakba nung Australian dollars (\$49bn) billion 74 intoktsü, kong Australian Guided Weapons

aser Explosive Ordnance Enterprise dak Australian dollars billion 21 intoktsüba densema lir.

“Asenoki tsükchirtem dang Australia anema jenjang agiba takok mangutsü ta sayutsüla,” ta Conroy-i ashi.

“Supply-chain minprongba aser strategic fragility agi sünga aliba lima ka nung Australia-i missile talila alizüksüba dang masü saka linük nunga timba yanglutsüla,” ta pai shisem.

Australia-i 2029 küm nungi rapidly deployable, surface-to-surface weapons export asütsü atema Lockheed Martin den longjemer Guided Multiple Launch Rocket Systems (GMLRS) linük nung yanglutsü atema sen 316 million Australian dollars (\$206m) intoktsü. Iba factory nung ya küm nung GMLRS 4,000 yanglutetsü, koba alima ajunga nung tang yanglua aliba quarter ka asütsü, ta Conroy-i ashi.

Defence Minister Marles-i ashiba agi, GMLRS yanglutsü atema amenokba facility nung ya tanga hadira aika yanglutetsü.

France indang Thales-ia, howitzers nung amshiba 155mm M795 artillery ammunition yanglutsü atema Australia kübok Benalla tesem nung sorkar meyong munitions facility ka nung teyangludak ka amenoktsü.

Iba ya US sülen mezüngbuba tanga linük ka nung factory amenokba asütsü aser 2028 küm nungi yanglu tenzüksü. Iba factory nung küm nung injang 100,000 yanglutsü.

August ita Australia-i, Norway indang Kongsberg Defence & Aerospace den longjemer Australia kübok Newcastle yimti nung long-range Naval Strike Missiles aser Joint Strike Missiles yanglutsü ta sangdongogo.

# MULUNGNEN O

Onoki teti meima aliba obala, mapang tatsüka mozükidang shiranga aliba mapang nungi tasüba anogo tashi shirnokisa rongsen, nübu aser sarasadem nung yariogo, nenok ajak dangi ozüi tsüngdong marutetakasa kangasa pelaba lemsateper. Ano mozükidang amungdang doctor aser nurse temi kanga junga anepaluba asoshi onoki kanga pelaba metetdaksür. Asen Tsüngremi dang nenok mapa tajung asoshi tali moajang ta ozü sarasadem.



Asür Olaba (Longsa)  
Tasüba Anogo : 21/10/2024

**Kinungtsü, Chirnur, Adianu aser Anükabang.**

# TAI TONGLOKJA ALIR OKADAKI ARUTSÜ SANGDONGER

See Section 82 Cr.P.C.

Tai tonglokja alisang **Moiko Yephomi, R/o H. No. 61, Village Ghowota, PO Dhansiripur, Dimapur, Nagaland, India** yagi case **FIR No. 181/15, U/s 420/406/34 IPC, P.S. Dwarka North, Delhi** nung aibelenogo (mesüra aibelener südi ta temulung melempi) küdangi ken o bener aru aser iba sülen **Moiko Yephomi** aputsü atema totuyuba agüjaka pa mangu aser **Moiko Yephomi** ya atsükshia senzür (mesüra pa sasa ken o nungi jenbuttsü meranger) ta angateter.

Anungji **FIR No. 181/15, U/s 420/406/34 IPC, P.S. Dwarka North, Delhi** nung tai tonglokja alisang **Moiko Yephomi** ya iba ken o nung telanzüba agütsütsü asoshi iba Court matsüngdang **04.12.2024** tashinung arutsü sangdonger.

By Order  
**Ms. Neetika Kapoor**  
Judicial Magistrate First Class-06  
Room No. 514, 5th Floor  
Dwarka Courts, New Delhi

DP/13979/DW/2024

# Spain tzümetsüng lendong nung nisung jenti asü

**Valencia, Mongputeni/Oct. 30 (Agencies):** Spain linük south-east tsütsü tzünglu kanga sashia arur ajungbena tzümetsüng adokba lendong nung nisung 51 asüba tejangja lir.

Valencia anasa Chiva jila nung küm ka dak tema arutsüba tzünglu ghonda ti nung aru aser nisung asüba ajunga jangjatsübo tamakoktsü, ta yangji aliba ketdangsür temi ashi.

Social media nung video prokshiba nunga tzümetsüng agi apu pongzükter aoba aser lenmang nung gari metsüngzuka bener aoba nguogo. Nisung karbo tzü agi ponger maotsü mechi süngdong nung soketa aliba video tema nguogo.

Spain linük tuluba nung tzünglu tessashi den rer aser yipru agi kongshia ajungbena tesem balala nung tzümetsüng adok.

Rescue operation nung yariteptsü asoshi nisung 1,000 dak tema yoka lir aser ano nisung aika kong aliar mejangja lir.

Balearic asetkong nunga ki o jen raksaba aser nisung asü-amaba osang lir.

Spain King Felipe VI-ia tzümetsüng ajanga pa temulung raksar ta ashi aser asü-amar kibongtem den asükhu lemsatepa liasü.

Tzümetsüng adoka alidak nungi nüburtemi Radio aser TV stations dangi teyari mechia call asür aser emergency services temi tesem karbo metongteter.

Rescuers temi kanga sashia kongshir aliba Letur municipality nung samar alirtem bushiba

nung drones amshir, ta yangji ketdangsür Milagros Tolon-i Spanish public television station TVE dang ashi.

“Item nisungtem ngutettsü ya tongtipangtiba lir,” ta pai ashi.

Police temi emergency hotline number sangdongogo aser nüburtem dang samar aliba osang phone number 9006 5112 nung agütsütsü ashi.

“Lenmang tongtitem ajunga nokdanga lir aser lenmang tilatema aika nokdanga lir,” ta region nungi ketdangsür Pilar Bernabe-i ashi.

“Temai madoktsü ashiba ya tema tazütsü atema shidangba kisüng masü, ibai nüburtem kumzüksü asoshi nüngdakba sangdong lir.”

Spanish weather service AEMET ajanga ashiba agi Valencia region nung Chiva nung Mongulbarnü ghonda ti nung tzünglu 491mm arua liasü – koba küm ka tepiyong aruba den sako lir.

Parnoki Valencia region nung red alert sangdongogo aser Andalusia nunga tesem kar nung ‘second-highest level of alert’ sangdonga lir.

Tzümetsüng yagi transport nunga timtem ajurua lir aser Valencia nung anentsü aliba tayimtsü aika danga yimtitemi yokogo aser kar thiogo. Valencia region nung train services ajunga khen asoshi soita lir, ta national rail infrastructure operator ADIF ajanga ashi.

Valencia city hall-ia Bodhbarnü school aser saisapong sentong ajunga soita lir ta ashi aser parks tem shibanga alitsü.



# Kongyak Students' Union Mokokchung-i MDFA Trophy 2024 Marok benogo



MDFA Trophy 2024 Final asaya Tongti Tesemdanger Wb.Tsüknungtemsü Lemtur Founder & CEO, Tribpix, MDFA officials aser Champion K.S.U.M telok külemi tangokba noksa.

**Mokokchung, October/Mongputeni 30 (TYO):** Imkongmeren Sports Complex Mokokchung nung tanü MDFA Trophy 2024 Final Telongjem F.C aser Kongyak Students' Union Mokokchung (K.S.U.M) tsüngda asayaogo aser iba asaya K.S.U.M teloki goal 1-0 agi Telongjem F.C kokteta MDFA

Trophy 2024 marok benogo. Tanü final asaya Telongjem F.C aser kongyak Students' Union Mokokchung (K.S.U.M) tsüngda asayadang asaya tenzüker minute 13 buba nung K.S.U.M telok nungi J.no-6 Angki Konyak-i goal 1 yok aser par telok takoklen sür anisüngzükba mapang agi.

Anisüngzükba mapang agir tanaben aita asayadang telok anapronglai takok angutsü meranga asayatep aser iba mapang nung K.S.U.M telok nungi J.no-5 L. Ating Konyak, J.no-10 Pangteih Konyak aser J.no-18 Naohan Konyak par asem Yellow Card achi. MDFA Trophy Champion

K.S.U.M teloki Champion marok den certificate aser sen Rs,200000/- agizük. Runners Up Telongjem F.C teloki Runners Up marok den certificate aser sen Rs,100000/- agizük. Iba den asayar item yagi certificate den sen Rs,30000/- agizüka liasü:

**Best Goalkeeper** – Nungsangyanger (Super Seniors F.C)  
**Best Defender** – Temsuyanger (Zonipang S.A)  
**Highest goal scorer** – Japeth Kath (Telongjem F.C)  
**Most Promising Player** – Merangtemjen (M.M.S.C)  
**Player of the tournament** – Menguzelie Rhutsa (Telongjem F.C)  
 Tanü MDFA Trophy 2024 Final asaya metenzükdang sentong tatsüka agia liasü aser iba sentong nung Tongti Tesemdanger Wb. Tsüknungtemsü Lemtur Founder & CEO, Tribpix ajanga tayongzükba o tatsüka jembiba den Mokokchung District Sports Council tenung nung ADC Mkg. Chumlamo Humtsoe-i salem o jembi aser iba den MDFA President Wb.N.Akok Lkr-i tepela O jembiba den Halinator ajanga ken tajung ka aten. Sentong ya Dr.Limasenla ketdangsüba nung agiba den sentong nung Tsüngremer temoatsü lenisüba jazüka Konyak Baptist Church, Mkg. Pastor Lemching-i sarasadema liasü.

## England den asayamung atema West Indies team sangdongogo

**Mongputeni/October 30, 2024 (Agencies):** October 31 nü nungi tenzüka England den linük nung ODI asayamung atema West Indies-i asayar 15 tenüng sangdongogo.

Shimron Hetmyer shiba jurila maparen kar aliba ajanga Sri Lanka den ODI asayamung nung masayai liasü, pa meyipa aruogo. Wicketkeeper-batter ya 2023 küm nungi tang tashi nung ODI asayamung ka nung danga asaya mali.

Opener Alick Athanaze, shibai Sri Lanka den asayaba mapang asaya ana nung run 11 dang yanglua liasü, pa England den asayamung atema meshim. 2005 küm sülen tang mezüngbuba Sri Lanka nung West Indies team-i ODI asaya ka akokba mapang century ka yangluba sülen England den asayamung nunga Even Lewis-i opener shilem agitsü imlar.

Head coach Darren Sammy-i ashiba agi, team ana tsüngda tetoktepa balaka lir

koba küm aika tejakdang nungi lir.

“England den asayaba ajanga challenge tasen agütsür aser linük ana tsüngda tetoktepa balaka asür aser iba atema asayar aser Caribbean nungertem yongyatepa atar,” ta Sammy-i ashi. “England den asayaba mapang West Indies team-i junga asayatetsüsa lenmang angur,” ta paisa ashi.

“Team ana tsüngda tetoktepa joko küm aika aser taoba küm mapang talangka sülen par linük nung ODI asayamung akokba sülen onok England team den asayatsü renema lir. Linük nung asayatsü ya jangrademtsüka, kong asaya shia local temi pusemba ajanga tashi aser tejangraba ka agütsür. 2027 küm ICC Men's World Cup atema qualify asütsü temulungdang yur onoki team tajung ka shimogo aser iba team yagi alima nung team tajungtiba rongnung ka ya nongshia asayatsü,” ta paisa ashi.

**West Indies ODI squad:**

Shai Hope (c), Jewel Andrew, Keacy Carty, Roston Chase, Matthew Forde, Shimron Hetmyer, Alzarri Joseph, Shamar Joseph, Brandon King, Evin Lewis, Gudakesh Motie, Sherfane Rutherford, Jayden Seales, Romario Shepherd, Hayden Walsh Jr

**England ODI squad:**

Liam Livingstone (c), Dan Mousley, Will Jacks, Jacob Bethell, Jamie Overton, Sam Curran, Phil Salt, Michael-Kyle Pepper, Jafer Chohan, Jofra Archer, Adil Rashid, Saqib Mahmood, Reece Topley, John Turner.

October 31 nü mezüngbuba ODI asayamung ya Sir Vivian Richards Stadium nung asayatsü. Tanabuba ODI November 21 nü kasa tesem nung asayatsü. Tasembuba ODI ya November 6 nü Kensington Oval, Barbados nung asayatsü.

## Indian Women's League 2025 küm January ita tenzüksü

**Mongputeni/October 30, 2024 (Agencies):** Indian Women's League tanabuba season 2025 küm January ita 10 nü nungi tenzüka home-and-away format nung asayatsü renema lir, ta sangdong ka ajanga metetdaksü.

Indian Women's League tanabuba season nung team ti asayaba angutsü, kong toba IWL 2 season champions Sreebhumi FC (West Bengal), aser runners-up NITA Football Academy

(Odisha) na tang mezüngbuba asayatsü renemdar.

League ya January 10 nü asaya ana asaya-a tenzüksü. Mezüngbuba asaya defending champions Odisha FC aser East Bengal FC na 3 ako nungi Kalinga Stadium, Bhubaneswar nung asayatsü.

Kasa anogo tanabuba asaya Gokulam Kerala FC aser Sreebhumi FC na Payyanad Stadium, Manjeri nung 4 ako nungi tenzüka asayatsü.

Team tem temaba jenjang asoshi season tepeyong kanga mazüngi asayaba angutsü. League ita asem tashi asayaba mapang asayatem Kolkata, Bengaluru, New Delhi, Chennai aser Bhubaneswar ta yimi balala nung asaya senzütsü.

Mezüngbo iba league ya 2024 küm October ita tenzüka ita trok asayatsü renemer liasü ajisüka taruba küm January ita nungiang asayatsü asoshi telemtetba agia thinenogo.

## ICC Rankings: Kagiso Rabada No. 1 asayar kümogo



**Mongputeni/October 30, 2024 (Agencies):** Tawa sayaba ICC Test bowlers rankings nung South Africa nung pacer Kagiso Rabada-i India nung asayar Jasprit Bumrah ajateta temaba jenjangi tuogo.

Mirpur nung Bangladesh den mezüngbuba Test asaya South Africa-i wicket tenet agi akokba asaya nung Rabada-i wicket teku agiba sülen pa temaba jenjangi tuogo. Iba asaya nungsa Rabada-i pa indang career nung Test wicket 300buba agia liasü.

Asaya nung kanga junga shilem agiba sülen Rabada jenjang asem tejakdangi tua Bumrah ajatetogo.

Arishi küm 29 tain Rabada ya 2018 küm January ita mezüngbuba Test bowler tem rongnung temaba jenjangi atu saka 2019 küm February ita tsükatok.

Bumrah tang tasembubai asepzüka luogo. Tanabuba

jenjang nung Australia nung pacer Josh Hazlewood lir. Kasa mapang nung India nung off-spinner Ravichandran Ashwin pezübuba aser Australia captain aser fast bowler Pat Cummins pongububa nung lir.

Pakistan nung spinner Noman Ali-a top 10-i ia tang 9buba nung lir.

England den tanabuba aser tasembuba Test asayaba mapang Noman-i ball kanga junga ona par team takok dangi ania liasü. Pa jenjang ti tejakdangi tua tang 9buba tongtetogo, koba pa indang career nung tashi nung jenjang tajungtiba asütsü.

Left-arm spinner Mitchell Santner, shibai Pune nung India den Test asayaba mapang tongibang shilem agia liasü, pa jenjang 30 tejakdangi tua tang 44buba nung lir.

India den tanabuba test asayaba mapang pai wicket 13 agia par team nem teyari tulu agüja liasü.

## BILEMDANGANG

“Mapa tajung ka tenzüksü atema tsüba teli.”